

GERRAREN AURKAKO EKIMENAK. Milaka herritar kalera atera dira Euskal Herrian deitutako manifestazioetan Iraki erasotzeko asmoa gaitzesteko. George Bush, Jose Maria Aznar eta NATO izan dira batez ere, jendearen oihuen jomuga.



LUIS JAUREGIALTZO / ARGAKZI PRESS

BILBO, JENDETSUENA. Udaltzaingoaren arabera, 100.000 lagun bildu ziren Bilboko manifestazioan. Manifestazioko burua helmugara iritsi zenean, zenbait jende abiatu gabea zen.

Euskal Herriak ere, gerrari ez

Aspaldiko manifestaziorik jendetsuenak izan ziren atzo Euskal Herriko hiriburuetan egindakoak

Asier Iturriagaetxebarria | **BILBO**
Luis Karlos Garcia | **GASTEIZ**
Eneko Bidegain | **BAIONA**
Eider Goenaga | **DONOSTIA**
Kristina Berasain | **IRUÑEA**

Milaka lagun (100.000, Udaltzaingoaren arabera) batu ziren atzo Bilbon *Iraken aurkako erasorik ez!* pankartaren atzean. Antolatzaileak «pozik» agertu ziren bizkaitarrek gerraren aurka erakutsi zuten jarrera irmoagatik. Jesusen Bihotzen plazatik ir-

ten zen mobilizazioa 17:30ean, eta lehenengoak Areatzara heldu zirenean, 18:40an, azken manifestariak irten gabe zeuden.

Gasteizen aspaldiko manifestaziorik handienetako bat izan zen atzo: Udaltzaingoak 18.000 lagun zeudela esan bazuen ere, antolatzaileen arabera 25.000 bildu ziren. *Gerrarik ez* zioen pankartak, eta horixe izan zen oihurik ohikoena, NATO, Bush eta Aznarren kontrakoez gain. Ibilaldiak, 0 gradutan egina,

edadeko jende dezente nahiz etorkin ugari elkartu zituen. Amaierako idatzia Andra Mari Zuriaren plazan irakurri zuten; Bernardo Atxaga idazleak egin zuen euskaraz eta Fatu Seyidi sahararrak gaztelaniaz.

Baionan bi manifestazio izan ziren. Lehenak, frantses sindikatu eta alderdiek deiturik, mila lagun bildu zituen. Bigarrenean, 600 bat manifestarik bat egin zuten gerraren aurkako kolektiboarekin. Lehenean, jendeak

berak egin pankarta txiki ugari ikus zitekeen. Batek horrela zioen: «Bush, petrolio nahi baduzu, *Prestige* emango dizugu».

Pio XII. plazatik milaka lagun irten ziren, Donostian, 18:00ak jotzerako, *Gerrarik ez. Gelditu dezagun gerra* zioen pankartaren atzean, eta Prim kalearen amaierara bitartean, jendeak manifestazioarekin bat egiten jarraitu zuen. «Ez, ez, ez, gerrarik ez», «Petrolioarengatik odol gehiago ez», «Bush, Aznar, Sha-

ron, zuek zarete terroristak» eta gerraren kontrako hainbat eta hainbat oihu entzun ziren.

Iruñean, 30.000 lagunek baino gehiagok bat egin zuten gerraren aurkako mezua aldarrikatzeko. Gerraren aurkako plataformak deitu ekimenean 20.000 lagun baino gehiago bildu ziren, eta PSN, IU, UGT eta CCOOren deialdian 10.000. Bi deialdi eta lelo bakarra *Gerrarik ez*. Hotzak ez zuen jendearen protesta nahia apaldu.

KOMUNIKATUAK

BAIONA

Bi manifestazioetan mezu bera zabaldu zen: «Prestatzen ari den gerra, NBeren oniritziarekin edo gabe, katastrofiko izanen da jadanik sufritzen duten irakiarrentzat, baita Ekialde Hurbileko herritar guztientzat ere. [Frantziako] Gobernuari eskatzen diogu ez dezan gerra horretan parte hartu, gerra horri buruzko prestakuntza guztiei uko egin dezan eta bereziki estatuko aire espazioaren erabilpena itxi dezan».

BILBO

«Bushen benetako arrazoiek ez dute zerikusirik desarmearen, demokraziaren, giza eskubideen edo nazioarteko legalitatearen aldeko defentsarekin. AEBetako Armada da munduan gerra gehien sortu duena, herri gehien inbaditu dituen eta arma gehien erabili dituen. Gainera, azken hamarkadetan AEBek hainbat diktadura lagundu dute eta laguntzen jarraitzen dute. Lurralde hartan aliatuak onena Israel da».

DONOSTIA

«Amerikako Estatu Batuetako Gobernuak berriz Iraken kontra egitea erabaki du. Golkoko Gerraren ostean, non milaka irakiar erail zituzten, eta 12 urteko blokeoak milioi eta erdi lagun hilketa eragin ostean —horietako 900.000 umeak—, Aznarren Gobernuaren laguntzaz genozidioa handitzera doaz. (...) AEBek Planetan duten nagusitasuna indartzea bilatzen dute, horretarako euren indar militar osoa erabilita».

GASTEIZ

«George Bushen gobernuak, gobernu bakoitza baino gehiago olioduktoa dirudienak, Iraken lurpean den munduko bigarren petrolio erreserbaz jabetu nahi du. Horretaz gain, bere gastu militarren dirutza zuritu beharra dauka; gerra industriaren azken modeloak bataila zelaian erakutsi beharra dauka. Hori da kontua. Gainerakoak aitzakiak dira. Eta hurrengo sarraskiaren aldeko aitzakiek adimena iraintzen dute».

IRUÑEA

«AEBekiko mendetasuna erakutsiz, Espainiako Estatuak Iraki eraso nahi dio. Berdin du suntsipen armarik duen ala ez, helburua zonaldean beren interesak ezartzea baita. Multinazionalentzat eta gobernuentzat errentagarriak dira gerrak, baina hildakoak eta mina herriek jasanez behar izaten dituzte. Ahal dugun guztia egin behar dugu, teleberri odoltsuen ikusle ohituak izatera behartu nahi gaituen katea hausteko».